



MUSA AHMAD (tengah) ketika hadir dalam pelancaran Potongan Gaji Skim Wakaf Tunai Dana Wakaf Al-Abrar di Nilai, Seremban, Negeri Sembilan, baru-baru ini.

Berwakaf melalui potongan gaji

SEREMBAN 7 April - Pusat Pembangunan dan Pembiayaan Wakaf (PPPW) Universiti Sains Islam Malaysia (USIM) mengambil pendekatan baharu dalam memberi peluang kepada masyarakat untuk melaksanakan amalan berwakaf dalam bentuk tunai melalui pelancaran Potongan Gaji Skim Wakaf Tunai Dana Wakaf Al-Abrar.

Skim itu telah diperkenalkan bagi memudahkan semua kakitangan awam dan swasta untuk menunaikan ibadah wakaf dan dapat menyelesaikan masalah yang sering berlaku dalam menunaikan ibadah wakaf.

Majlis pelancaran skim potongan gaji wakaf itu telah dirasmikan oleh Naib Canselor USIM, Prof. Datuk Dr. Musa Ahmad.

Katanya, sebagai perintis, skim

itu difokuskan kepada kakitangan USIM terlebih dahulu dan akan dikembangkan secara berperingkat-peringkat kepada pihak luar.

"Inisiatif yang diambil oleh PPPW itu adalah selari dengan usaha USIM untuk menerajui dan menggalakkan pembiayaan pembangunan wakaf.

"PPPW akan menguruskan kutipan dan agihan tabung amanah wakaf USIM berdasarkan keputusan Majlis Wakaf USIM bersama Majlis Agama Islam Negeri Sembilan (MAINS) dan Jawatankuasa Dana Wakaf Al-Abrar," katanya di Nilai dekat sini baru-baru ini.

Jelasnya, dana wakaf yang dikumpulkan itu akan digunakan untuk aktiviti dakwah, pendidikan, penyelidikan, penerbitan, kesihatan, pembangunan pendid-

kan dan fasiliti kesihatan.

"Skim itu terbuka kepada semua kakitangan awam dan swasta yang beragama Islam.

"Masyarakat bukan Islam juga boleh memberi sumbangan wakaf tunai secara potongan gaji asalkan mereka bersetuju memenuhi syarat dan prosedur ditetapkan," ujarnya.

Katanya, penyumbang juga tidak terhad kepada kakitangan syarikat dan agensi di Negeri Sembilan, malah terbuka kepada pihak luar untuk memberi sumbangan wakaf tunai secara potongan gaji.

Kerjasama awal USIM-MAINS dalam memanfaatkan pembiayaan dana wakaf adalah menubuhkan Klinik Pakar Kesihatan USIM dan Klinik Hemodialisis di Nilai Square, Bandar Baru Nilai.